

新元史

列傳

第三十六至第三十九

冊柒拾叁第

列傳第三十六

新元史卷之一百三十九

賜進士出身日講起居注官翰林院侍讀國史館纂修膠州柯劭忞撰

張柔

宏彥

宏略

宏範

珪

張柔字德剛涿州定興人少慷慨尚氣節以豪俠稱右額有異肉如錢怒則墳起貧不事產業嘗曰大丈夫當爲公侯田舍翁不足道也金貞祐間河北盜起柔年三十四有女道士蔡氏語之曰金祚將訖君當爲諸侯輔新朝以兵法授之柔聚衆保西山東流砦選壯士以自衛盜不敢犯縣人張信假柔勢納流人女爲妻柔鞭信百而還其女信憾之謀殺柔旣而信有罪當誅柔救之

獲免部衆益服柔之威德中都經略使苗道潤承制授柔定興令累遷青州防禦使道潤表其才加昭毅大將軍遙領永甯軍節度使兼雄州觀察使權元帥左都監行元帥府事道潤爲其副賈瑀所殺瑀使告柔曰吾得除道潤者以君不助兵故也柔怒叱其使曰瑀殺吾所事吾食瑀肉且未足快意反以此言戲吾耶遂移檄道潤部曲會於易州軍市川誓復仇適道潤麾下何伯祥得道潤所佩金虎符以獻因推柔行經略使事金主加柔驃騎將軍中都留守兼大興府尹本路經略使行元帥事太祖十三年大兵出紫荊口柔戰於狼牙嶺馬蹶

被執遂以衆降太祖還其舊職得便宜行事柔攻下雄
易安保諸州獲賈瑀剖其心以祭道潤瑀部將郭瑀亦
降盡有其衆徙治滿城金真定帥武仙來攻柔從數騎
躍馬直抵仙營敵衆披靡獲其旗鼓以歸又明日益張
旗幟爲疑兵援桴徑進仙大敗僵尸數里乘勝攻完州
命部將聶福堅架飛梯躍而登城鞏彥輝率突騎繼之
城遂拔獲州佐甄全詞色不撓柔義而釋之十四年仙
復來攻敗之進拔郎山祁陽曲陽諸城寨既而中山叛
柔引兵圍之與仙將葛鐵槍戰於新樂流矢中柔額折
其二齒拔矢以戰斬首數千級遂克中山仙復攻滿城

柔登城拒戰爲流矢所中仙兵大呼曰中張柔矣柔不爲動開門突擊仙敗遁又敗仙兵於祁陽進攻深澤甯晉安平拔之分遣別將攻下平棘藁城無極欒城諸縣拓地千餘里由是深冀以北三十餘城緣山鹿兒野狸等寨相繼降一月之間與仙十七戰仙望風輒敗方獻捷於行在所次宣德而易州軍叛逐其守盧應據西山馬頭寨以自保柔聞之卽引還出奇兵破其寨叛者皆伏誅加榮祿大夫河北東西等路都元帥賜號拔都將士遷授有差蒙古帥孱赤台數凌柔柔不爲下乃譖柔於行省曰張柔驍勇無敵嚮被執而降非其本意今委

以兵柄威震河朔失今不圖後必難制行省召柔至囚之土室辱赤台立帳寢其上環以甲騎明日將殺之辱赤台一夕暴死柔始獲免二十年武仙旣降復叛殺元帥史天倪其弟天澤來乞援柔遣驍將喬惟忠等率千餘騎赴之仙大敗遂分遣惟忠宋演略彰德聶福堅略大名璽書授柔行軍千戶保州等處都元帥二十二年移鎮保州州燬於兵十餘年爲盜藪柔畫市井定民居修官廨引泉水入城疏溝渠以洩之遷廟學城東南增其舊制屹然爲河朔重鎮太宗四年從睿宗伐金語其部將曰吾用兵殺人多矣甯無寃者自今以往非與敵

戰誓不殺人大兵圍南京柔軍於城西北金人屢出戰柔皆郤之金哀宗自黃陵岡渡河敗走歸德崔立以南京降柔入城於金帛無所取獨入史館取金寶錄并秘府圖書訪求耆獻及燕趙大姓十餘家衛送北歸從大軍圍歸德城瀕水諸將背水而營柔曰敵開門擊我必擠我於水中眾不聽旣而金人果乘夜來襲衆潰亂柔率百餘騎援之敵敗走復益兵而出勢張甚柔命檣舟南岸示無還意下令登舟者斬使一卒執大旗立隄上伏戰士於下伺敵至擊之敵竟不敢逼而退金主走蔡州州恃柴潭爲阻宋孟珙以兵來會決其南潭水涸金

人懼開門死戰柔中流矢如蝟爲金人所獲珙麾兵救之挾柔出已而宋兵奪柴潭樓柔使聶福堅先登破外城又遣張信墮其西城諸軍齊奮東城始陷大將下令屠城一小校縛十人以待一人貌獨異柔問之狀元王鶚也乃解其縛賓禮之後卒爲名臣六年柔入朝太宗厯數其功班諸將上賜金虎符升萬戶七年從皇子闖出伐宋拔棗陽又從大帥太赤攻徐邳奪其外城宋守將出戰諸軍悉力拒之柔繞出敵背擊之敵潰走溺死者甚衆又與史天澤邀擊潰走者盡戮之後從大帥察罕出許州略淮東西分戍許鄭兩州而還九年詔屯兵

曹武以逼宋道出九里關柔欲率所部徑進或言道隘
宋必設伏柔不聽從以二十騎方解甲而食伏起圍數
重左右皆失色柔怒馬馳突竟與二十騎達於曹武復
攻拔洪山寨寨據山頂四壁斗絕柔肉薄而上剗其壘
遂會諸軍圍光州柔夜遣輩彥輝率勁卒二百伏城西
南柔攻其西北城人悉力拒柔彥輝乘虛而入拔其外
城宋守將降又進攻黃州宋重兵據三山寨地險絕柔
誘敵出戰潛遣死士從間道魚貫而上會天霧守者不
覺遂崩潰斬馘數萬柔壁於黃州西北隅城人有乘舟
出者柔曰此僨我者也夜必襲我不備乃分軍爲三以

待之宋人果夜至柔大敗之宋人懼請和柔乃班師使
王安國攝行府事戍光州察罕攻滁州柔以二百騎往
城久不下察罕欲解去柔請決戰旣陣柔突入宋軍宋
將執柔轡曳之遇救得還飛石中柔鼻裏創復戰夜遣
輦彥輝刦其營焚城東南隅柔率銳卒先登竟入滁州
十一年詔以本官節制河南諸翼兵馬征行事河南三
十餘城皆屬焉柔辟王汝明爲書記汝明年二十餘始
見柔說以軍事柔與語竟日不覺墮塵尾於地自是深
重之明年詔柔等八萬戶伐宋王汝明說柔曰明公終
歲用兵惟資兩淮糧穀以給軍食非久遠計也莫若用

許鄭兩州戍兵開屯墾以給糧儲柔從之十三年賜御衣數襲名馬二尙廄馬百匹柔帥師自五河口濟淮略和州進攻壽州裨將趙明石文戰歿柔哭之曰當爲婚姻不負汝也師還命王汝明聶福堅將千人屯田於襄城察罕奏柔總諸軍屯杞縣初河決於汴西南入陳留分而爲三杞居中渾宋人恃舟楫之利由亳泗以窺汴柔乃夾河築連城通以浮橋爲進戰退守之計未幾又敗宋兵於泗州王汝明漕襄城粟數千斛至軍食以濟冬還軍杞縣命子宏範娶趙明女以已女妻石文之子人皆服其信義乃馬真皇后稱制五年柔帳下吏夾谷

顯祖得罪亡走上變誣柔詔逮柔至和林訊之執政素
知柔以百口保之卒辯其誣顯祖伏誅柔聞陵川郝經
賢請教其諸子經爲柔論經國大要柔深加禮敬焉憲
宗卽位換金虎符三年柔遣王安國與總管叱刺攻宋
廬州四年王安國略漢南深入而還柔遣張信戌潁州
自帥山前漢軍城亳州移戍之五年安國復侵宋率水
軍出台子灣抵蒙縣柔會元帥不憐吉歹攻蘄州及五
河口自亳州以南築甬道抵百丈口中爲橫堡又東六
十里立柵水中由是宋之舟師不能北犯奏入憲宗大
悅賜衣一襲翎根甲一金符九銀符九頒將校之有功

者九年分遣裨將張果王仲仁從憲宗入蜀王安國胡進田伯榮宋演從塔察兒攻荆山柔自從世祖攻鄂世祖出大勝關柔出虎頭關與宋兵遇於沙窩柔子宏彥擊敗之世祖濟江柔以兵來會使何伯祥作鵝車洞掘其城別遣勇士先登城垂陷憲宗囚問至宋亦行成世祖北還使統諸軍以俟後命中統元年世祖卽位詔班師阿里不哥叛徵柔入衛至盧朐河復止之分其兵三千五百人衛京師以子宏慶爲質子二年正月入朝於上都廷議削諸侯權選耆德監之諸萬戶懼請柔沮其事柔言於上曰今治郡者皆年少未習於政事若獲罪

不加以刑則廢法重繩之則沒其先世之微勞請使老成人監之爲便世祖大悅遂立十道安撫司諸萬戶皆怒已而咸德之三年柔請老年已七十封安肅公以第八子宏略襲其職李璮反詔柔與子宏範率精兵二千入衛未幾復止其行宋夏貴出蘄州爲璮聲援宏範敗之至元三年城大都起柔判行工部事將二十萬人以受役子宏略佐之御史臺建博羅請以柔爲御史大夫帝曰臺臣構怨之地非所以處功臣也議封柔國公帝以柔起於燕成功於蔡詔自擇之柔曰燕天子所都臣封蔡足矣乃進封蔡國公刻印賜之五年六月卒年七

十九贈推忠宣力翊運功臣太師開府儀同三司上柱國謚武康延祐五年進封汝南王謚忠武子十一人福壽早卒宏基順天宣權萬戶宏正襲宣權萬戶宏規從郝經受左氏春秋順天涿州等路新舊軍奧魯總管第四子宏彥第八子宏略第九子宏範最知名

宏彥從郝經受學善騎射前後殺虎以百數從伐宋荆山有功授新軍總管攻鄂州先登者再中統元年扈駕上都改順天路新軍總管三年授新軍萬戶佩金虎符至元二年授鄂州萬戶十六年裕宗在東宮召爲侍衛親軍副都指揮使年四十告老八十而卒

宏略字仲傑憲宗五年入朝授金符權順天萬戶從征蜀以其幼賜錦衣還柔致仕授宏略金虎符順天路管民總管行軍萬戶仍總宣德河南懷孟等路諸軍屯亳州中統三年李璮反求救於宋將夏貴貴乘虛北奪亳滕徐宿邳滄濱七州新蔡符離蘄利津四縣殺守將宏略率戰船禦之於渦口貴退保蘄縣宏略水陸並進宋兵素憚毫軍焚城宵遁盡復所失地李璮旣誅追問當時與璮通書者獨宏略書勸以忠義事得釋朝廷懲璮叛逆務抑諸侯權以保全之因解宏略兵職宿衛京師賜只孫冠服以從宴享至元三年城大都佐其父爲築

宮城總管八年授朝列大夫同行工部事兼領宿衛親軍儀鸞等局十三年城成賜內帑金鉢璫珮卮授淮東道宣慰使十四年宋廣王昺據閩廣時東海縣儲粟數萬行省檄弘略將兵二千戍之仍命造舟運粟入淮安宏略雇民舟有能載粟十石者與一石人爭趨之一月而畢十六年遷江西宣慰使會饒州盜起犯都昌宏略以饒州雖屬江東與南康止隔一湖寇不滅則南康必有相扇而起者乃使人擣其巢穴縛賊酋磔于市餘黨潰散下令曰不操兵者皆爲平民餘無所問頃之以疾歸有讒貴臣子在江南買田宅詞引宏略或謂宏略曰